

Tindakan undang-undang peniaga ingkar SHMMP

Peladang,
pemborong serta
peruncit sudah
ditetapkan
had harga

Oleh Rafidah Mat Ruzki
dan Noor Atiqali Sulaiman
bhnews@bh.com.my

Putrajaya: Tindakan undang-undang akan mula diambil ke atas individu yang mengingkari penetapan harga ayam berdasarkan Skim Harga Maksimum Musim Perayaan Hari Raya Puasa (SHMMP) dilaksanakan sejak 21 April lalu, seiring berakhirnya tempoh menyesuaikan harga.

Menteri Perdagangan Dalam Negeri dan Hal Ehwal Pengguna, Datuk Seri Alexander Nanta Linggi, berkata pelaksanaan harga barangan itu dijalankan pada setiap peringkat bermula daripada peladang, pemborong dan peruncit.

“Harga maksimum sekilogram ayam yang ditetapkan pada peringkat peladang ialah RM5.80, pemborong RM7.10 dan diikuti peruncit pada RM7.90.

“Sekiranya pemborong menjual lebih mahal daripada RM7.10, ia melanggar peraturan dan tindakan undang-undang boleh diambil.

“Sekiranya semua pihak me-



Perdana Menteri, Tan Sri Muhyiddin Yassin menandatangani plak sempena lawatan ke ECC dan KPDNHEP sambil disaksikan Alexander (kanan) dan Rosol (dua dari kanan) serta Hasnol Zam Zam di Putrajaya, semalam.

ngikut harga ditetapkan, tiada isu peruncit terpaksa menjual mahal sebab kita sudah hadkan harga di setiap lapisan,” katanya.

Beliau berkata demikian pada sidang media selepas Majlis Amanat Perdana Menteri sempena Lawatan ke KPDNHEP dan Pusat Arahan Penguatkuasaan (ECC) di sini, semalam.

Yang turut hadir, Timbalan Menteri Datuk Rosol Wahid dan Ketua Setiausaha Kementerian Perdagangan Dalam Negeri dan Hal Ehwal Pengguna, Datuk Seri Hasnol Zam Zam Ahmad.

Laporan sebelum ini menyebut, ada peniaga enggan menurunkan harga ayam kerana apa yang ditetapkan kerajaan sama dengan yang diambil pemborong.

Mereka mendakwa, langkah kerajaan menyekat kenaikan harga ayam tidak bersifat menyeluruh, sebaliknya membunuh masa depan golongan peniaga yang terhimpit ketika ini.

Sementara itu, Alexander berkata, kementerian akan mengumumkan lebih 30 barangan tersenarai dalam SHMMP secara berperingkat.